

現代生活藝術系列

華嚴經疏論纂要 20

— 如來名號品

華藏淨宗學會印贈

大方廣佛華嚴經疏論纂要卷第二十

五臺山清涼國師澄觀疏鈔

大原方山長者李通玄論

閩鼓山私淑比丘道霈纂要

如來名號品第七

○將釋此品五門分別。初來意

〔疏〕來意者。先明分來。前既舉果。令生信樂。今明能生因果信解。故次來也。二會來者。生解之中。信爲其首故。又前舉所信之境。今明能信之行。故次來也。三品來者。前品舉因顯果。成所信之境。今舉果

辨因彰能信之行。果中三業。身爲其總。故先來也。
又遠答前名號海問故。

○二釋名

〔疏〕釋名亦三。初分名修因契果生解分。謂修五位之圓因。成十身之滿果。令諸菩薩解此相故。卽生修因契果之解。依主釋也。二會名。約處。名普光明殿會。然有三釋。一以殿是寶成。光普照故。二佛於其中放音光故。三佛於殿中說普法門慧光照世。故立其名。依前一義。卽依主釋。後二有財。約法。則名信行之會。三品名。如來現相品已釋。召體曰名。

表德爲號。名別號通。一切諸佛。通具十號。名釋迦等。則不同故。如來卽十之一。品中正說。隨機就德。以立別名。旣表德之名。則亦名亦號。如來之名號。依主釋也。

○三宗趣

〔疏〕宗趣亦三。初分宗。謂以修生修顯因果爲宗。令諸菩薩修行契入爲趣。二會宗者。若就總望。信解行德攝位爲宗。通成佛果爲趣。信能必到如來地故。近望唯信爲宗。成位爲趣。若以此下三品以爲一分。卽果用應機。周徧法界。以爲其宗。依此起信。

爲趣。故此亦名正報因果。亦是所信。信何法門。信佛身名。等於衆生。則知我名如佛名也。信佛法門。隨宜而立。知我妄念苦集。亦全法門。信佛意業。光明徧照。則知自心無不知覺。故先古諸德。亦將上三品舉果分收。三品宗者。顯佛名號周徧爲宗。隨機調化利益爲趣。或上二皆宗。生信爲趣。鈔修生

果爲宗者。修生約差別因果。修顯約平等因果。若就總望等者。亦名爲遠望。爲成佛果故爲遠。其解行德故爲總。解即問明。行即淨行。德即賢首。近望者。唯望十住。故爲近。亦合各別。將前攝位。爲此趣。故攝位者。十信滿心。頓攝諸位。今此唯爲成十住。故仁王不開十信。攝在十住。信爲能成。住爲所成。亦名正報因果者。毘盧遮那是因。此三品爲果故。亦是所信者。賢首向前亦將此三屬所信因果中。

正報
果故

○第四問答

〔疏〕問。五周因果。差別平等不同。何以分名。合之爲一。答。通生差別平等解故。離於修生。說何修顯故。問。前會舉果。本爲生信。今何重舉名號等三。答。凡約境生信。有其二義。一。標舉境法。明有所在。二。攝以就心。令成信行。前會約初義。此會約後義。問。何不入定。以未入位。性不定故。若爾。十定豈散善耶。然說法之儀。通有四句。一定後說。如諸會。二說後定。如無量義經等。三定中說。如第九會。無出言故。

四不入說。如此信中。及第七會。諸文非一。第九表證。唯證能說。一得永常。不礙起用故。第七爲表常在定故。又入爲受加。彼不須加。故不須入說。後入者。說在行故。將起後故。是知動寂唯物。聖無常規。故下文中。辨十信之用。一方入正定。餘方起出說。自在無礙也。餘會摩頂後說。此會說後摩頂。是知此經體勢縱橫。不可定準。

論第二會六品經。明菩薩信心門。於此一會之中。自有序分。正說流通。今從第十二卷初爾時已下。有四行半經。是序分。已下至賢首品。是正說分。賢

首品末有三行半經。是流通分。第七如來名號品。從此已下至賢首品。是第三長科文中。以果成信。信自己心是佛分。於此一段之中。約有六法。以成信心佛果。令信者入佛果故。一佛名號品。令信心者。信佛名號。徧一切世間名。知名性離故。二四聖諦品。令信心者。自信一切世間苦諦卽聖諦。不別求故。三光明覺品。令信心者。自以自心光明。覺照一切世間無盡大千世界。總佛境界。自亦同等。以心隨光。一照之。心境合一。內外見亡。初三千大千世界已。次還以東方爲首。光至東方十三千大

千世界。照百三千大千世界。如是十方十重。倍倍周迴。十方圓照。身心一性。無礙徧周。同佛境界。一一作意。如是觀察。然後以無作方便定印之。入十住初心。生如來智慧家。爲如來智慧法王之眞子。一如光明所照。如經具明。不可作佛光明。自無其分。須當自以心光如佛光。開覺其心。圓照法界。四問明品。令信心者所信之法門。五淨行品。令信心者。信菩薩初發心時。皆發大願爲首。又令信心者。便圓無始妄念。以成智海無生滅性。六賢首品。令信心者。信佛神力。通化無邊得大自在。及信心之

福。信此六法。名爲賢首。以此六法。觀行相應。名爲信心。皆以不動智佛等十智如來。是自心之果。以不動智爲體。餘智爲用。至下方明。文殊師利覺首。目首十首菩薩等。是修行信心者之身。此品已下。至賢首品已來六品經。是長科一部經中。第三以果成信門也。爲明初會是舉佛果勸修。信諸佛所得。此第二會一會。以果成信。信自心是佛。與果佛不異故。至文方明。前之已成佛果。將用勸修。此舉佛名號果勸修。十方世界無有一名非佛名者。名體性自解脫故。但隨衆生所聞不同故。此明佛名。

號徧周。卽明於一切名。無所著故。釋此品作三門。
一釋品來意。二釋品名目。三隨文釋義。一釋品來
意者。明前之初會。但明如來成等正覺之身。及智
攝生。未明如來名號攝生廣狹。今此第二會。普光
明殿。方明佛果名號攝生故。此品須來。又爲舉佛
果名。令生信解故。此品須來。前會明身智徧周。此
會明名身及智俱徧周故。初會世主雖問。未有其
答。此品答前所問。使令生後信者之心。令使信佛
名身及智。普徧法界。應機利物。照俗破迷。故成普
光明殿。約德名殿。約殿明德故。此品須來。於此佛

名號中。約有五緣以成佛號。一以法界自體根本智緣以成佛號。二約如來示成正覺約自德緣以成佛號。三約如來利生方便緣約位進修以成佛號。四明如來以一切衆生隨根所樂緣以成佛號。五約法界體用平等緣。一切諸法總名佛號。一以法界自體根本智以成佛號者。如下不動智佛。無礙智佛。滅暗智佛。如是十智佛號是也。以此法界根本智上。以施十種之名。以成十種信力。至位方明。大意令衆生達自根本無明。本唯如來根本大智。令諸衆生頓識本故。頓作佛故。二約如來示成

正覺自德成號者。卽十方諸佛示成正覺。共同十號。所謂如來應供正徧知是。又毘盧遮那是總名。是大智光明照耀種種諸法。及種種衆生故。故毘云種種。盧遮那云徧照。三明如來利生方便約位進修緣以成佛號者。卽如下舉十箇根本不動智佛以成十信。舉十箇月佛下名。悉同號之爲月。以成十住。明創契法身本智。心得清涼。爲明此位菩薩契理惑亾。得法性智清涼故。約自得益之法以成佛號。十行位中。以十箇眼佛下名。悉同號之爲眼。爲明十行。以智知根。利生攝益。故佛號爲眼。以

善知根性故。皆是約自得益立名爲佛。十回向中以十箇妙佛上名。悉同號之爲妙。爲明十回向位中菩薩進修漸熟。妙智現前。故佛號爲妙。十地同妙。已上以明從十信中。自信自心分別之智。與一切諸佛根本不動智佛本來是一。以成信心。心外見法。不成信心也。從此信已下。以三昧力。契理會源名爲十住佛號。爲月。皆是約修行之人所得之法。以成佛號。安立五位五十箇佛名。五十箇因五十箇果。爲當位具因果故。成一百重因果。爲根本五位中本有五因五果。成一百一十重因果法門。

四明如來以一切衆生隨根所樂以成佛號者。卽以對現色身。等衆生界。爲佛。爲天。爲神。爲王。爲人。爲仙。徧衆生界。令諸衆生不作惡者。總是不可以自凡情所測也。總是佛名號徧周。五明法界體用平等。一切諸法總名佛號者。爲一切諸法。及以名言。自體性離故。一切法自體性離。卽法界性。法界性卽佛號故。是故一切法及名言。皆是佛號故。爲如來。稱此一切法自性離之法。以成佛故。如三乘中亦說根本智。後得智。今欲令三乘人迴心。指此金色世界不動智佛。令使直認是自心能分別智。

本無所動。文殊師利。卽是自心善簡擇無相妙慧。覺首目首等菩薩。卽是自心隨信解中所見之理智。如是三乘之人未迴心者。定當不信。何以故。爲歷三阿僧祇劫。後當得佛故。爲直認自身及心。總是凡夫。但信佛有不動智等。不自信自心是根本不動智佛。與佛無異。以是義故。不成此教。法界乘中。以根本智爲信心。此經信心。應當如是直信自心分別之性。是法界性中根本不動智佛。金色世界。是自心無染之理。文殊師利。是自心善簡擇妙慧。覺首目首等菩薩。是隨信心中理智現前。以信

因中契諸佛果法分毫不謬。方成信心。從此信已。定慧進修。經歷十住。十行。十迴向。十地。十一地。日月歲劫時分無遷。法界如本。不動智佛如舊。而成一切種智海。教化衆生。因果不遷。時劫不改。方成信也。若立僧祇定實。身是凡夫。凡聖二途。時劫移改。心外有佛。不成信心。如是已上。有此五種佛名號不同。三隨文釋義者。於此段中。義分爲二。一長科三十二品經意。第三禪中說十一地一品未來。二科當品經意。一長科三十二品者。從此如來名號品。第二會世主起問二十八問已下。直至向後。

如來出現品。是世王所問一終因果。所答總有三十二品經。是答二十八問故。以從普光明智法界佛果報居之殿。舉佛果名號。并舉佛果所行教化衆生四聖諦法門。并舉法界根本智體佛號不動智佛。以成信修。直至彼如來出現品三十二品經。是信進修行之一終因果之極也。明此普光明智殿佛果。至如來出現品。此信進修行因果不二故。又明此始成正覺果德之上。起信心修行。至後如來出現品中。明法界無時可隔故。明法界體中凡夫妄見。見無量劫。始起信進修行者。依真起行。以

爲進修。經歷五位行門。無時可移故。若未起信進
修行時。常謂已前諸佛。先已成佛。經無量劫。及其
以正信力。使見十方無量劫已成佛者。而自身與
彼先成佛者。一時成佛。無先後故。以是義故。如來
始成正覺時。如今凡夫始發菩提心起行進修。自
行已滿。畢竟不離如來初成正覺初出現時。爲無
情量。依本法界。本無時故。故經言。發心畢竟二不
別者。爲法界性無三世故。二世時無別。以無時故。
智無別。爲不異不動智佛體故。妙慧用無別。不異
文殊善簡擇妙慧故。行無別。爲從初發心不異十

波羅蜜行。普賢行而爲修行故。大悲無別。常教化
故。大願無別。不捨衆生故。四攝無別。四無量心無
別故。三十七道品無別。故云。發心畢竟二不別。如
是二心。先心難。爲明入此信解者難故。若心外信
有他佛得道。我是凡夫者。卽世間人情量是。此乃
不論信進修行。直是生歿長流。常隨見網。何大苦
哉。以此如今第二會。及初會明始成正覺後三十
二品。又著如來出現品。明始終信進修行者。與三
世佛一時出現。明法界總一時故。如持寶鏡。普臨
衆像。頓照顯現。無前後時故。明於法界根本佛智。

境界中頓現衆法。不可將情量度量。作前後解故。
一依彌勒樓閣中境界。初會中始成正覺佛是舉
果勸修佛。出現品中佛。是明諸菩薩進修五位因
果。行終佛。與信位中不動智佛相對故。自此如來
名號品已去。直至如來出現品。總有三十二品經
是十信。十住。十行。十迴向。十地。十一地進修因果。
以初卽後。以後卽初。不二之位故。如大王路。其法
常爾。非故新也。如文殊師利頌云。一念普觀無量
劫。無去無來亦無住。如是了知三世事。超諸方便
成十力。二科當品者。於當品中長科爲四。如文自具

○第五釋文。從此終第七會。卽當第二修因契果
生解分。若順諸會。應直分問答。今爲順文。一會
分三。第一序分。第二請分。第三說分。鈔若順諸
會者。以六
會共答此中間故。第一序分。唯
屬此會。爲加序分。名爲順文。今先序分。具如
經初。但加普光。以爲小異。畧分爲三。初標主時
處。

爾時世尊。在摩竭提國。阿蘭若法菩提場中。

○二別顯三事

始成正覺。於普光明殿。坐蓮華藏師子之座。妙悟皆
滿。二行永絕。達無相法。住於佛住。得佛平等。到無障

處不可轉法。所行無礙。立不思議。普見三世。

〔疏〕分三。初別顯說時。二於普光下。別顯說處。處在菩提場東南。可三里許。熙連河曲。彼河之龍。爲佛造此。今舉總攝別。前標國名。以本收末。上舉場稱。故下不動覺樹而徧十方。

〔論〕爾時已下兩行。經是序分。序前初得菩提處。并普光明殿。意明二處不異。爲不移本處道場。而身徧坐一切處。故爲菩提場體。是法界體。故爲普光明殿。是法界報居所都。故法報二體。性相一真。本末因果。本無異故。由斯道理。故重序之。

〔疏〕三妙悟下。別顯主德。亦卽示成正覺之相也。準第八會初。及深密經等。皆說佛有二十一種功德。升兜率品。當廣明之。今文有初十句。亦畧釋耳。十句中。初總餘別。總中妙悟皆滿者。妙悟。晉經名善覺論。經名正覺。以梵音云蘇。合於妙善及正等故。譯者隨取。悟卽覺也。雙照真俗。故稱妙悟。備下諸句。異於因人。故復稱滿。別中。一二行永絕者。煩惱所知。生歿涅槃。皆名二行。俱不現前。名爲永絕。煩惱所知者。親光云。凡夫二乘。現行二障。世尊無故。凡夫現行生歿。起諸雜染。卽煩惱障。二乘現行涅槃。

繁。弃利樂事。世尊無彼二事。故云永絕。二達無相
法者。清淨真如。名無相法。達者了也。三如來常住
大悲。任運利樂。又常安止。聖天梵任。故云任於佛
任。鈔聖天梵任者。即智論第三云。聖謂三乘聖人。
天謂六欲天。梵即色無色。復次三三昧名。聖任
布施持戒善心三事。名天任。四無量是梵任。釋曰
此雖二文。義乃是一。前舉果任。後出因耳。或爲四
任。謂加佛任。如來常住。楞嚴諸三昧。故雖徧任。
四任。智海已滿。大悲深故。特言大悲。即梵任所攝。
四所證能證。及以化用。皆等諸佛。五具能治道。解
脫障故。六所說教法。外道不能轉故。七行諸世間
違順魔。冤不能礙故。八安立教法。超言念故。九於
三世境。若事若理。了達記別。無錯謬故。具此九別。

成初總句。同異成壞。準思可知。

○第三輔翼圓滿

與十佛刹微塵數諸菩薩俱。莫不皆是一生補處。悉從他方而共來集。普善觀察諸衆生界。法界。世界。涅槃界。諸業果報。心行次第。一切文義。世出世間。有爲無爲。過現未來。

〔疏〕文分二別。一標數揀定。菩薩揀非凡小。補處明非下位。他方而來。非舊衆也。言一生者。釋有二義。一約化相。謂如彌勒。此復有三。二人中一生。二天上一生。三下降一生。正取天中。二約實報。一生謂

於四種變易生處中。唯有末後一種。名無有生處。一位所繫。此文多約化相耳。鈔一生者。此生之後。便成佛故。如那舍人。當涅槃故。二音善下。歎其勝德。德雖無量。畧歎一音。善觀察者。能觀智也。音有二義。一音衆同有此德。二音觀十境。善有三義。一善知相。二善知無相。三善知此二無礙。衆生界下。明其所觀。皆具上三義。十中初是總句。所化衆生。次此生何來。由迷法界。起於世界。我當令彼任涅槃界。淨諸業果。故須識心行之病。文義之藥。令厭世間。欣出世間。不盡有爲。不任無爲。上辨橫觀十法。今豎達三世。觀涅槃。知

已現當證。觀諸業。已現當造。果報。已現當受。心行。
已現當發。餘可類知。亦以六相融之。第一序分竟

○第二請分。分二。先舉人標念

時諸菩薩。作是思惟

○二正顯問端。然句雖五十。問但四十。以第二
句。是說意故。此四十問。望第一會。有同有異。後
二十句全同。前二十句大同小異。又復前後不
同。初十句。卽前第三十海。前會卽總說所觀。深
廣。此則別說。如來依正。以前會中爲總故。此會
別顯信所依故。故前會皆致海言。此中但云利

等。第二十句。前名菩薩十海。此列在等行位。前通諸會。總顯圓融。行布因故。此約常分。欲顯差別。因之相故。後二十句。雖則全同。前總此別。又前卽所信。今辨所成。欲顯所信所成。體無異故。文句全同。若唯約義。亦可分三。謂初十句。問佛德應機。無方大用。辨因所依果。次十句。問菩薩行位。卽果所成因。後二十句。佛果勝德。顯因所成果。是則以佛爲緣而起。於因還以此因而成於果。是此分之大意也。故論云。多聞熏習。無不從此法身流。無不還證此法身。卽其義也。今取

文義俱便。大分爲二。初十句直爾疑問。後三十句引例請問。義不異前。今初。

若世尊見愍我等。願隨所樂。開示佛刹。佛住。佛刹莊嚴。佛法性。佛刹清淨。佛所說法。佛刹體性。佛威德。佛刹成就。佛大菩提。

[疏]文二。先總顯請意。後開示下。別列所疑。十句依正間問者。正報應機。必依刹故。亦表依正無障礙。故五句依者。一刹類。二莊嚴。三清淨。四體性。五成就。上五卽前二海。廣如四五二品。其佛住等五句。卽正報大用。一佛身徧住諸刹。佛心常住大悲。二

所具功德。及所證法性。三隨機說法。四作用威光。
 五修行得證。現成菩提。然此五卽前會七海。一卽
 佛海。二卽解脫海。三卽演說海。四卽變化海。五卽
 名號。及壽量海。波羅蜜海。其衆生海。但是所化。故
 畧不舉。合諸海中。此之十句。下有言說。及現相答。
 至下當知。鈔一利類者。卽形狀長短等。言卽前二
 海。廣如四五二品者。第四成就品。答世
 界安立海。第五華藏
 世界品。答世界海故。
 ○第二引例請問。文分爲三。初十句標彼說意。明
 其有悲。後三十句舉彼所說。顯其有智。末後一
 句。結以正請。彼佛旣爾。此亦宜然。今初

如十方一切世界諸佛世尊。爲成就一切菩薩故。令
如來種性不斷故。救護一切衆生故。令諸衆生永離
一切煩惱故。了知一切諸行故。演說一切諸法故。淨
除一切雜染故。永斷一切疑網故。拔除一切希望故。
滅壞一切愛著處故。

〔疏〕十句中。初句總。謂令諸菩薩行願成就故。餘九
別。一上繼佛種。二云何繼。以救衆生故。三云何救。
令離惑故。四如何救。知彼根行故。五以何救。說法
藥故。六成何益。一除集諦染。二決道諦疑。三拔苦
希望。四證滅愛處故。又成菩薩行。具悲智也。具此

悲智。何所爲耶。令佛種不斷。佛種不斷。有何相耶。謂成三德。救護衆生。成就恩德。永斷煩惱。成於斷德。了知諸行。成於智德。諸行有三。一者心行。二所行行。三所了行。謂一切行無常無相。卽所了也。云何救護。演說諸法。云何永斷。淨諸雜染。永斷煩惱。種現雙亡。除諸雜染。謂唯現惑。云何成智。謂永斷疑網。智成何益。斷諸希望。惑除何益。滅諸愛著。一切著者。著有著空。著行著果。不著諸法。正智現前。悲救衆生。佛種不斷。是菩薩之要。諸佛之本意也。所陳諸問。一一皆有斯益。又釋。一切菩薩是所成。

就云何成就。不斷佛種。卽自成就。救護眾生成就。於他云何救護。謂離二障。永斷煩惱。無煩惱障。了知一切。無所知障。以何方便。能斷二障。謂說諸法。此煩惱障。其相云何。謂愛與見。除諸雜染。絕愛煩惱。永斷疑網。絕見煩惱。此所知障。其相云何。謂於境不了。有所希望。法執未忘。一切生著。今相無不了。何所希望。達法性空。當何所著。二障旣寂。二智現前。成菩提涅槃。謂不斷佛種。則菩薩成就矣。

○第二舉彼所說。文分爲二。初十句問因。後二十句問果。今初。

說諸菩薩十住。十行。十迴向。十藏。十地。十願。十定。十通。十頂。

〔疏〕文有九句。昔云。欠第九十忍一句。又以十信自不成位。是住方便。攝在住中。故不別問。〔翻〕又以十其所以不開十信。則不合。問信。下有忍品。故知脫忍。十頂。新舊梵本俱無忍。問。答中卽有。故知彼忍。卽此頂也。言十頂者。因位終極。十定十通。皆等覺位。十忍居後。又得頂名。問中約位終極。故名爲頂。答據法門忍受。以智印定。故云忍也。非位終極。不具十忍。非有十忍。不極。因位。二文更顯。故十忍品末云。通達此忍門。成就無

礙智。超過一切衆。轉於無上輪等。既言超過。卽是頂義。亦猶四善根中忍頂法門。義相類。故不爾。忍無別問。空答何爲。設欲成十。應脫十信。十信雖未成位。亦隨法界修廣大行。德用殊勝。別一會答。應有問故。若將十忍已下四品。共答頂問。於理無失。俱是等覺之終極故。上引但明信任不開。今明何必要開。而不妨有問。何者。十願十藏。非是別位。得爲問端。信不成位。何妨有問。又藏願等。寄他會答。尚有別問。十信法門。別一會答。解行德能。三品宏淡。豈合無問。

○第二二十句問所成果

及說如來地。如來境界。如來神力。如來所行。如來力。

如來無畏。如來三昧。如來神通。如來自在。如來無礙。
如來眼。如來耳。如來鼻。如來舌。如來身。如來意。如來
辯才。如來智慧。如來最勝。願佛世尊。亦爲我說。

疏全同初會。於中亦初十句明內德成滿。後十句
體相顯著。初中如來神力。前會名佛加持。卽神力
加持故。神通約外用無壅。神力約內有幹能。離世
間品各有十事。其相自別。言無礙者。謂如來所作。
無能障礙也。上文名無能攝取等。義皆同也。後十
中辨才是語業。智慧是意業。最勝是身業。準前會
中。唯欠佛光明之一句。餘如前釋。其所答文亦如

前引出現不思議。相海品說。但前總會。故引此文。所引之文。正答今問。說者宜重引之。三願佛下。結請。請同彼說。故致亦言。請分竟。

〔論〕問曰。初會中世主所問。與此義多相似。但廣畧不同。何故此第二會。還復再問如上之問。答曰。前會。是世主問。舉佛果勸修。信佛所得。此會。是自信自身自心。是佛。及入位修行。故須再問。前位。是瞽賢入定。舉果。此會。卽明文殊生起。入信之初。卽明凡夫始信。爲彰信心。麤故。不入定說。十住已去。始明當位菩薩入定。始說。以是義故。前問雖義理少。

同。應緣差別故異。前會信他佛得。此會自入信修行也。古人說前會是請。此會是問。其義不然。前後總是其請。當請是問故。但爲勸修與自入法事少殊。如前會舉如來修行道滿。及過去諸佛已成道者。行滿之果。此第二會舉十方諸佛根本之智。凡聖共有之果。卽一切處金色世界。一切處不動智佛。十智佛等是也。明一切諸佛衆生。共有此不動智。金色是理。法性身也。爲信心生滅。故言色也。以十色世界表之。

○第三說分。於中通下六會。答此所問。準問長科。

亦爲三分。此初三品。答所依果問。二問明已下。答所修因問。三從不思議品下。答所成果問。其平等因果。因乃果中之因。果乃此果之用。故屬果收初中分二。先如來現相答。由其念請故。又如來證窮故。後文殊言說答。伴助主故。假言顯故。今初分二。一佛現神通。二衆海雲集。今初爾時世尊。知諸菩薩心之所念。各隨其類。爲現神通。〔疏〕知其心念者。領念請也。現神通者。示相答也。言隨類者。有其三義。一隨疑者所宜異故。謂或示色令見。以聲令聞。冥資令曉。皆是現通。以法界身。圓

明頓現也。二隨疑者流類別故。三隨疑者所疑異故。謂若疑十信即見如來足輪放光。周乎法界等。若疑十住則見如來足指放光。百刹塵外菩薩集等。如放光一事既爾餘相皆然。鈔謂若疑十信下。於中初疑十信即是此文。及第十三經光明覺品。言周乎法界等等者。等取十方名過十佛刹微塵數。世界菩薩雲集故。下經云。悉以佛神力故。十方各有一大菩薩。一各與十佛刹微塵數諸菩薩俱等。若疑十住者。即第三會十住品初言菩薩雲集等者。此一等等字等取行向地等。謂十行則足上放光。十向則膝輪放光。十地則眉間放光等。十行十刹。十向十千等。此一等字等。於一分放光中事。如放光下。例於餘相。謂動刹南。故知初會現相。徧於華香雲等。皆隨宜不同也。九會。此會現神通。通於一分。結集隨義編之作次。

耳。故下三會。皆有不起覺樹之言。故知初會下。示通局。此會望初則局。一分。彼通。九會。謂佛前現華。通表一部所詮。華嚴眉間勝音。通表九會能詮。教故結集編次。非現前後故。下三會下。引文爲證。既不起前二。而昇四天。明正當此處。現通四天齊現耳。

○第二衆海雲集

現神通已。東方過十佛刹微塵數世界。有世界名金色。佛號不動智。彼世界中有菩薩名文殊師利。與十佛刹微塵數諸菩薩俱來詣佛所。到已作禮。卽於東方。化作蓮華藏師子之座。結跏趺坐。

南方過十佛刹微塵數世界。有世界名妙色。佛號無礙智。彼有菩薩名曰覺首。與十佛刹微塵數諸菩薩

俱來詣佛所。到已作禮。卽於南方。化作蓮華藏師子之座。結跏趺坐。

西方過十佛刹微塵數世界。有世界。名蓮華色。佛號滅暗智。彼有菩薩。名曰財首。與十佛刹微塵數諸菩薩俱來詣佛所。到已作禮。卽於西方。化作蓮華藏師子之座。結跏趺坐。

北方過十佛刹微塵數世界。有世界。名蒼蔔華色。佛號威儀智。彼有菩薩。名曰寶首。與十佛刹微塵數諸菩薩俱來詣佛所。到已作禮。卽於北方。化作蓮華藏師子之座。結跏趺坐。

東北方過十佛刹微塵數世界。有世界名優鉢羅華色。佛號明相智。彼有菩薩名功德首。與十佛刹微塵數諸菩薩俱來詣佛所。到已作禮。卽於東北方。化作蓮華藏師子之座。結跏趺坐。

東南方過十佛刹微塵數世界。有世界名金色。佛號究竟智。彼有菩薩名自首。與十佛刹微塵數諸菩薩俱來詣佛所。到已作禮。卽於東南方。化作蓮華藏師子之座。結跏趺坐。

西南方過十佛刹微塵數世界。有世界名寶色。佛號最勝智。彼有菩薩名精進首。與十佛刹微塵數諸菩

薩俱來詣佛所。到已作禮。卽於西南方。化作蓮華藏師子之座。結跏趺坐。

西北方過十佛刹微塵數世界。有世界名金剛色。佛號自在智。彼有菩薩名法首。與十佛刹微塵數諸菩薩俱。來詣佛所。到已作禮。卽於西北方。化作蓮華藏師子之座。結跏趺坐。

下方過十佛刹微塵數世界。有世界名玻璃色。佛號梵智。彼有菩薩名智首。與十佛刹微塵數諸菩薩俱。來詣佛所。到已作禮。卽於下方。化作蓮華藏師子之座。結跏趺坐。

上方過十佛刹微塵數世界。有世界名平等色。佛號
觀察智。彼有菩薩名賢首。與十佛刹微塵數諸菩薩
俱來詣佛所。到已作禮。卽於上方。化作蓮華藏師子
之座。結跏趺坐。

〔疏〕衆海雲集。卽現相答初十句之問。光現佛刹。答
佛刹問。刹有金色等。是刹莊嚴。旣以金成。亦答刹
體。彼刹菩薩。亦刹莊嚴。菩薩大寶。以爲嚴故。亦刹
清淨。純淨佛刹。唯菩薩故。淨修梵行。是刹成就淨
土。行故。亦刹清淨。所修淨故。此已上答五句依問。
兼答五句正報。土各有佛。及見如來坐蓮華藏。是

答佛在。現通放光。是答威德。名不動智等。是答法
 性。見佛轉法輪。是答說法。佛成正覺。是答菩提。文
 雖在下。義皆此具。光明覺現。卽現此故。鈔文雖在下等者釋
通妨難。謂有難云。適所引文。皆光明覺品。此中現
 相。言答十問。乃引下經。豈成此答。釋云。六會現通
 尚在。一時。況光明覺。義不在此。故光明覺說。說此
 所現。是以此中別列十方佛刹菩薩。一一各說。光
 明覺品。一時總牒。明
 是說此所現相耳。 十方衆集。卽爲十段。一一方
 內。文各有八。一遠近。二土名。三佛號。四上首。五眷
 屬。六詣佛。七到已致敬。八化座安坐。去此遠近。皆
 十刹塵數者。前會爲說所信因果深廣。故須遠集
 華藏之外十方刹海。今爲說於生解因果。漸漸增

修。故但集娑婆隣次之刹信。行最劣。故復云十。後
後漸增。至法界品。還集刹海。初不云一。直云十者。
表無盡。故要刹塵者。比餘勝。故爲有所表。故分階
級。非初信等。不是通方。故結及證成。十方齊說。爲有
所表。下通難。難云。華嚴既是通方之教。未有一土
不說此經。今舉十刹。則十外不收。今說百刹。應百
外不攝。豈爲通方。釋意可知。又隨迷名外。悟處名來。而實佛土
本無遠近。土皆名色者。表信麤現。故亦表顯然。可
生信。故佛號同智者。有信無智。增無明。故信中之
智。本覺起。故主同名首者。梵云室利。一名四實。一
首。二勝。三吉祥。四德。是以譯者。前後不同。今通用

之。以信爲首。攝諸位故。次第行中。信最勝故。甚難
得故。於生。死中。創發信心。爲吉祥故。信能增長。智
功德等。一切德故。此十菩薩。同表信門。故皆名室
利。各隨一門。達一切法。故復有差。次文當釋。亦有
傳云。梵云室利。此云吉祥。室利云首。亦是一理。亦有
傳云者。卽興善三藏譯。余親問三藏。有同此說。今欲會意。故前收四說。眷屬皆十刹
塵者。表一一行。攝無盡德故。皆詣佛者。有歸向故。
餘如前會。又下菩薩名等。皆是表法。菩薩表所行
之行。本利表所證之理。佛名表所得之智。今初東
方言金色者。心性無染。與緣成器。爲自體故。本智

如空離覺所覺湛然不動動卽是妄非日智故又

縱成佛果不異凡故卽本覺智任心真如今初東方下別

釋十方八段之中皆釋三事一刹名二佛名三主菩薩名唯初東方按經之次下之九方從後倒釋

以十首菩薩表十甚深是助化主故先舉之餘二因此故在後釋細尋可知菩薩妙德

者慧達佛境處處文殊由慧揀擇契於本智故分

因果處處文殊者下文當釋從由慧揀擇下通難難云佛名不動智文殊表慧二相寧分答中

然智慧二字乃有多門今此正用分別名慧決斷名智以慧為因以智為果二覺首者

覺心性也無性不礙隨緣隨緣不礙無性無礙智

也。不染而染染而不染俱難了知為妙色也。三財

首者法財教化卽滅闇智了衆生空如蓮不著四

寶首者。真俗無違。可珍貴故。善知業果。不犯威儀。性相無違。唯一乘旨。是爲唯躡。薜蔔華矣。五德首。了達如來應現說法之功德故。卽是明於法相。又了佛德。心明白也。若有此智。如青蓮華。最爲第一。六目首。福田照導。如日將身。平等福田。爲究竟智。是最可重。故云金色。佛爲福田。以佛爲境故。同上。文殊依金色界。七精進首。正教甚深。必在精進。能策萬行。爲最勝智。圓明可貴。故復云寶。八法首。法門雖多。必在正行。於法能行。方得自在。得般若之堅利。爲金剛色。九智首。佛之助道。雖無量門。智爲

上首能淨萬行。故云梵智。智淨體淨。猶若玻璃。明
 徹無染。十賢首。前佛後佛。一道清淨。由自性善。故
 稱曰賢。能知此賢。是觀察力。觀察本性常平等。故
 又釋。十段皆暗取十甚深義。一云慧達佛境。即佛
 境甚深。故二覺首。緣起甚深。心性是一。故三財首。
 教化甚深。四寶首。業果甚深。五德首。說法。六目首。
 福田。七精進首。正教。八法首。正行。九智首。助道。十
 賢首。一道。又十佛相望。不動是體。餘皆是用。十菩
 薩相望。文殊為總。餘皆是別。以總導別。故九菩薩
 不離妙德。文殊為總者。若以法門為總。文殊主般若。
 若統收萬行。九首之德。皆是般若。隨緣
 別相。同明佛德。即是同相。緣起教化。互不相收。即
 是異相。統十甚深。為成佛境。即是成相。各任一甚
 深。即是壞相。餘如下說。若約人為總。別文殊為上
 首。故是總。餘九為伴。是別。同名為首。異即賢等。共

成十首表信之。以前後流例。畧爲此釋。惟虛已而人壞。各任自。求之。不信此理。甚深法門。於我何預。以前後流例。下。結釋勸修。

前如現華表義。現衆表教。後如十慧說。任。十林說。行。十幢說。向。十藏說。地。離世間品。菩薩萬行。寄表甚深。斯爲觀心。非是臆斷。不信此理。一向外求。如數他寶。故非我分。

論第三爾時世尊知諸菩薩心之所念已下。四十一行經。明如來神通現法分。於此分中。義分爲二。一明隨類現法。二明約初信心。第一隨類現法中。有二。一隨五位之中。菩薩之類。各現十種佛位。十任。十行。十廻向。十地。十一地中。各有隨位佛果名號。是二隨一切國刹。一切衆生之類。各現名號不

同。如下文殊師利所說佛號者是。第二約信心者。卽此當品。及通一部。總爲信心。於此信心。總信五位中因果。心無滯礙。方可以行修行。如有教說。譬如有人。過五百由旬嶮道。先知通塞。然後行往。喻如十信菩薩於信心之中。先知五位進修通塞。預以願行防之。以信自心分別之性。本是一切諸佛不動智體。用防邪見。外取他境故。以隨位妄識散動。障真智故。以禪波羅蜜防之。以隨位第八任。第八行。第八迴向。第八地。智增滯寂。障真無作大悲故。以一百四十大願防之。以樂生歿障真智故。以

四念處觀等三十七助菩提分防之。及十四諦觀。及十十二緣生觀防之。以十波羅蜜利益衆生。恐不弘廣故。以四攝四無量法防之。以求自樂果。教化衆生不周廣故。起十迴向。加以大願大慈大悲。不捨一切惡道地獄人天。徧生其處。以防自樂。違菩提心。有所得故。以是義故。十信之心。總通五位。悉皆成信。若自信徹趣求。無法不達。若也疑心不除。豈成信也。如此品舉佛果門。至賢首品舉佛神通。及佛所行行業。使初信心者信徹故。始名信心。今此一部之經。頓舉五位因果。諸佛果門。總成信。

也。從總信已入位修行。方始不迷理智。如人造食。五味一時頓熟。方始食之。從初食時。五味同食。乃至食竟。其味不離五也。明五位因果。十信總明。時亦不移本末。爲信三世一際故。畢竟佛果不離初信之法。如依椽畫像等喻。可知。於此神通示法門中。總有四十一行經。長科爲十一段。第一爾時世尊。知諸菩薩已下一行半經。明如來知衆所念。以神通現法。第二東方過十佛刹塵已。下三十九行半經。總明十方菩薩來集。十方自有分劑。不煩更科。於此十方菩薩來衆之中。義分爲十。一舉佛刹

方面。二舉佛刹遠近。三舉世界名色。四舉佛名號。五舉上首菩薩之名。六明大衆之數。七明大衆來已致敬。八明隨方化座。九明座之名目。十明大衆升座而坐。言彼世界中有佛號不動智者。爲明不動智佛。是十方凡聖共有根本之智。明於此智。能起信心。故號之爲來。此不動智佛。一切衆生常自有之。若取相隨迷。卽塵障無盡。若一念覺迷達相。卽淨若虛空。但爲隨迷稱外。悟處言來。而實佛刹本無遠近內外等障。亦無去來無邊佛刹。不出毛孔微塵之表。令致遠近。意令初信心者。心廣大故。

言其從彼世界中來。又明從迷人悟。故言爲來也。有佛號不動智者。明是信者。目根本智故。由有此智故。一切衆生而能發菩提心。以根本智體。能了迷性。超信解故。超彼迷境。稱之曰來。如起信論云。不思議業相者。以依智淨。能作一切勝妙境界。所謂無量功德之相。常無斷絕。隨衆生根。自然相應。種種而見。得利益故。又云。依本覺上而起不覺故。又云。依於智故。生其苦樂。如起信論廣明。意明一切衆生迷根本智。而有世間苦樂法故。爲智無性故。隨緣不覺。苦樂業生。爲智無性故。爲苦所纏。方

能自覺。根本無性。衆緣無性。萬法自寂。若不覺苦
時。以無性故。總不自知有性無性。如人因地而倒。
因地而起。一切衆生。因自心根本智而倒。因自心
根本智而起。以是義故。如來於此一乘之經。頓彰
本法爲金色世界。明法身白淨無染。頓彰本智號
不動智佛。頓彰文殊師利。是自心妙擇之慧。餘九
箇世界。九箇智佛。九箇菩薩。是隨自心信解修行
位上。進修增勝法身智身。隨行異名故。從斯自心
本不動智佛。目覺之上。見道人位。起十住。十行。十
迴向。十地。十一地。加行進修。法身智身。大願。大慈。

大悲四攝。四無量。十波羅蜜。二十七助道分法。從
初發心。根本法身。本不動智體。上用資萬行。悲願
叅融。互爲資熟。法身資行。使令無染。行資法身。使
令純熟。五位中。各各立十箇佛果。十箇菩薩。明隨
位進修中。約自行所得處。佛果菩薩行果立名。非
他佛號。非他菩薩而立其名。隨智佛果。隨其行果。
五位之上。因果各有五十。共爲一百。通本五位有
五箇因果。共爲一百一十城之法門。故問曰。一切
衆生。本有不動智。何故不自應真常淨。何故隨染。
答曰。一切衆生。以此智故。而生三界者。爲智無性。

不能自知。是智非智。善惡苦樂等法。爲智體無性。但隨緣現。如空谷響。應物成音。無性之智。但應緣分別。以分別故。癡愛隨起。因癡愛故。卽我所病生。有我所故。自他執業便起。因執取故。號曰末那。以末那執取故。名之爲識。因識種子。生處相續。以生處故。衆苦無量。以苦無量。方求不苦之道。迷不知苦者。不能發心。知苦求真者。還是本智會苦緣故。方能知苦。不會苦緣。不能知苦。知苦緣故。方能發心。求無上道。有種性菩薩。以宿世先已知苦發心。信解種强者。雖受人天樂果。亦能發心求無上道。

是故因智隨迷。因智隨悟。如人因地而倒。因地而起。正隨迷時名之爲識。正隨悟時名之爲智。在纏名識。在覺名智。識之與智。本無自名。但隨迷悟而立其名。故不可計常計斷名也。此智之與識。但隨迷悟立名。若覓始終。如空中求跡。如影中求人。如身中求我。依住所在。終不可得。故新長短處所之相也。如此無明及智。無有始終。若得菩提時。無明不滅。何以故。爲本無故。更無有滅。若隨無明時。不動智亦不滅。爲本無故。亦更無有滅。但爲隨色聲香所取緣。名爲無明。但爲知苦發心緣。名之爲智。

但隨緣名之爲有故。體無本末也。如空谷響。思之可見。

○第二爾時文殊下。辨言說答。就文分四。一歎衆希奇。二諸佛子下。牒問總歎。三何以故下。徵歎總釋。四諸佛子如來下。廣顯難思。今初。

爾時文殊師利菩薩摩訶薩。承佛威力。普觀一切菩薩衆會而作是言。此諸菩薩。甚爲希有。

〔疏〕前衆疑問。佛令文殊答者。以文殊示居此土。生有十徵。來自他方。體含萬德。降魔制外。通辨難思。化滿塵方。用周三際。道成先劫。已稱龍種尊王。現

證菩提。復曰摩尼寶積實為三世佛母。豈獨釋迦

之師。鈔以文殊者。釋文殊說意。上明是主菩薩。廬山遠公但云。文殊師利是遊方大士。唯見一

經。但觀一跡耳。今具出之。是主是客。亦果亦因。具

難思也。言示生此土者。即文殊般泥洹經云。佛言

跋陀婆羅。此文殊師利有大慈悲。生此國土。多羅

聚落。梵德婆羅門家。其生之時。家內屋宅。化如蓮

莖。從母右脇而生。身紫金色。墮地能言。如天童子。

有七寶蓋。隨覆其上。釋曰。言此國者。即舍衛國。佛

正在此說。故此經復云。文殊師利具三十二相。八

十種好。則相好同佛。復有經說。生有十徵。無非吉

瑞。一光明滿室。二甘露垂庭。三地踊七珍。四神開

伏藏。五雞生鳳子。六猪誕龍狗。七馬產麒麟。八牛

生白澤。九倉變金粟。十象具六牙。由是得立妙吉

祥號。來自他方者。即今經文。從東方金色世界。中

來。節節皆言所住世界。謂金色等。既周法界。不動

而徧。各領十佛。剎塵數菩薩。說佛功德。明萬德斯

備矣。上之二對。標其主客。下畧說勝德。降魔制外

通辨難思者。然此二句。有通有別。通則通用。通辨

降伏魔怨。制諸外道。別明以神通怖之以威。故言
降。用四辨屈之。以辨。故言制。然其事頗多。畧舉一
二。如幻三昧經云。時有善任意天子。白文殊。同見
佛。文殊現變三十二部。交絡重閣。有諸菩薩。先至
佛所。身子覩變。恠問佛。佛答。是文殊。令諸菩薩集
會。又問。何以不見文殊。佛答。文殊任降毀諸魔三
昧。正受蔽魔宮殿。與大威變。詣如來所。於是文殊
任降毀諸魔三昧。應時三千大千世界百億魔宮。
一。時皆蔽。不樂其處。各各懷懼。時魔波旬。自見老
耄。羸。毀少氣。拄杖而行。所有宮人。及綵女等。亦復
羸老。又見宮殿而復崩壞。暗暗冥冥。不知東西。時
魔波旬。即懷恐懼。身毛為豎。心自念言。此何變。恠
令吾宮殿委頓。乃爾。將成罪至。歸命終盡。天地遇
災。劫被燒耶。時魔波旬。奔除貢高。捨惡思想。時文
殊師利。所化百億天子。在交絡者。任諸魔前。謂魔
波旬。莫懷恐懼。汝等之身。終無患難。有不退轉。菩
薩大士。名文殊師利。威德殊絕。總攝下方。德過須
彌。智超江海。慧越虛空。於今已入降毀魔場三昧。
正受是其威神。下取意引。時魔恐懼。魔宮震動。求
化菩薩。願見救濟。菩薩答言。勿懼。可請釋迦如來。

所。有。無。盡。慈。悲。令。無。所。畏。言。訖。不。現。魔。即。俱。來。詰
佛。請。救。我。等。聞。文。殊。名。即。懷。恐。懼。不。能。自。安。畏。亡
身。命。佛。讚。文。殊。魔。請。歸。依。願。脫。斯。苦。佛。令。且。待。須
臾。文。殊。當。來。即。脫。此。難。後。文。殊。至。佛。問。三。昧。彼。廣
說。竟。令。捨。諸。魔。文。殊。問。魔。汝。穢。惡。此。身。耶。魔。答。云
爾。若。爾。當。厭。貪。欲。事。不。任。三。界。魔。敬。從。命。即。令。諸
魔。皆。復。本。形。五。體。如。故。等。此。即。降。魔。也。制。外。者。即
文。殊。般。泥。洹。經。佛。說。文。殊。初。詰。諸。仙。求。出。家。法。諸
婆。羅。門。九。十。五。種。諸。論。義。師。無。能。酬。對。唯。於。我。所
出。家。學。道。餘。文。廣。博。不。可。具。引。至。如。聖。智。怖。心。開
聲。揚。而。擗。地。寂。順。思。覩。入。隱。身。而。立。空。故。得。帝。釋
欣。喜。雨。天。華。而。至。膝。蔽。魔。愁。憂。行。拄。杖。而。垂。淚。劫
火。燒。刹。蹈。水。芝。而。上。行。霖。雨。絕。供。化。鉢。飯。而。無。盡
示。多。身。以。抗。迦。葉。放。一。鉢。而。發。本。原。皆。是。通。辨。降
魔。制。外。也。又。如。度。二。十。億。佛。現。說。法。者。持。地。猶。存
化。百。千。諸。龍。立。登。正。覺。者。王。女。是。一。是。以。禮。妙。慧
而。不。忘。敬。本。勸。善。財。而。增。長。發。心。無。言。於。不。二。法
門。悉。力。於。安。樂。行。品。教。龍。吉。祥。之。分。衛。下。位。莫。知
答。瑠。璃。光。之。光。明。正。覺。稱。妙。談。般。若。之。玄。致。屢。質
本。師。說。權。實。之。雙。行。頻。驚。小。聖。皆。辨。才。也。化。滿。塵

方者。辯德用橫。豎深廣也。謂十方微塵刹土。皆是
文殊化處。故菩薩處胎經云。我身如微塵。今在他
國土。三十二相。明在在無不現。餘如衆海雲集中
引。又般泥洹經云。住首楞嚴三昧。以三昧力。於十
方國。或現初生出家。滅度入般。涅槃。分布舍利。饒
益衆生。又寶藏陀羅尼經廣說。至下菩薩住處品
當更明之。卽今文中。一切處。一時說偈。卽橫周法
界。道成先劫者。此下別明。豎窮畧示一二也。先劫
卽過去名龍種上尊王。智度論十二具引首楞嚴
三昧經說名龍種上尊王。經文但名龍種上尊王。卽
譯人廣畧耳。五十三佛名。亦名龍種上尊王。其首
楞嚴三昧經有三卷。卽當下卷。因文殊廣說首楞
嚴三昧境界。竟爾時長老摩訶迦葉白佛言。世尊
我謂文殊法王子。曾於先世。已作佛事。現坐道場。
轉於法輪。示諸衆生。入大滅度。佛言。如是如是。如
汝所說。迦葉。過去久遠。無量無邊。不可思議。阿僧
祇劫。爾時有佛。號龍種上如來。應供。正徧知。云云。
於此世界南方。過於佛國土。國名平正。無有砂
礫瓦石。丘陵阜地。平如掌。生柔軟草。如迦陵伽
龍種上佛。於彼世界。得阿耨多羅三藐三菩提。初

轉法輪教化成就七十億數諸菩薩衆云云佛壽
 四百四十萬歲記智明菩薩次當作佛下結會云爾
 法任十萬歲龍種上佛豈異人乎即文殊法王子
 時平等世界龍種上佛豈異人乎即文殊法王子
 是現證菩提者即央掘摩羅經此經有四卷事出
 第四初卷中明舍衛城北有村名薩那有一貧窮
 婆羅門女名跋陀羅女生一子各一切世間現少
 失其父年將十二聰明辨慧有異村名頗羅訶私
 有一舊任婆羅門師受王請留其守舍師婦年少染
 間現從其受學師受王請留其守舍師婦年少染
 心逼之世間現不受其師少婦自懸毀害師歸言
 世間現強逼師言汝已爲惡當殺千人可滅汝罪
 即殺千人還歸見師性其存又令殺千人各取
 一指作髮冠首唯欠一人母爲迷食便欲害母世
 尊現前捨母趣佛爲佛所降廣顯深妙第四末波
 斯匿王嚴四兵至欲罰央掘來至佛所佛示央掘
 後發其迹云大王南方去此過六十二恒河沙利
 有國名一切寶莊嚴佛名一切過六十二恒河沙利
 進下取意引壽命無量國土嚴淨純說一乘即央
 掘是由前文殊廣與對揚後顯文殊之迹云大王

北方去此過四十二恒河沙刹。有國名常喜。佛名歡喜。藏摩尼寶積。純一大乘。無餘乘名。卽文殊師利是。故云現證菩提。復曰。摩尼寶積。蓋言畧耳。下顯師及師婦。央掘之母。三人皆是如來化現耳。上畧舉過現。不說未來成佛者。未來成佛。現卽是因非殊勝。故疏畧不顯。若欲說者。卽大寶積文殊會中說。於未來成佛。號普見如來。以恒河沙界莊嚴爲一。佛國以安養世界莊嚴比之。栴毛滴海。不可爲喻。其中衆生。具三十二相。天眼無礙。鏡照十方。不聞生老病死等苦。但出佛法僧之聲。若人欲見。應念便覩。不待解釋。疑網皆除。聞名得最上善利。聆記爲面見諸佛等。實爲三世佛母者。結其實德。七十九經云。文殊師利。所有大願。非餘無量百千億那由他菩薩之所能有。善哉文殊師利。其行廣大。其願無邊。出生一切菩薩功德。無有休息。善哉文殊師利。常爲無量百千億那由他諸菩薩師。教化成就一切衆無量百千億那由他諸菩薩師。教化成就一切衆生等。佛名經說。過去無量恒河沙佛。皆是文殊。教令發心。然猶帶數。故今顯實。實爲一切佛母。不可窮其始末。豈獨釋迦之師者。卽前所引處胎經云。

昔爲能仁師。今爲佛弟子。一尊不竝立。故我爲菩薩。卽法華九世祖師。亦帶方便。住首楞嚴三昧。亦是跡中。故弛張乎權實之場。瑩徹乎真如之際。住諸佛不思議之境。豈可語其始終。無言疆言。爲三世佛。影響而來。一切咸見故。其說也。何不待請。敬母耳。影響而來。一切咸見故。其說也。何不待請。同佛故。何不待告。承佛神力。佛意許故。衆旣念請。佛方現相。非夫尊極大士。安能理契潛通。故上以光示普賢。此乃冥加妙德。若爾。普賢云何定後更請。表說所信甚深細故。何不入定。以果從因。同於信故。餘如上說。何故無加。以無定故。又承佛神力。是冥加故。影響而來者。結也。影響顯非實因也。何不入定者。問意云。信未入位。許不入定。說佛三業。何不入定。故爲此通。以果從因。因卽歎十信。十信不入。果亦不入。是十信中所說果故。歎

衆希有者。畧有五義。感應懸隔難一遇故。德行內
克。總稱歎故。以名表法。甚希有故。創起信行。未會
有故。此一衆會。卽是等空法界會故。

○二牒問總歎

諸佛子。佛國土不可思議。佛住。佛刹莊嚴。佛法性佛。
刹清淨。佛說法。佛出現。佛刹成就。佛阿耨多羅三藐
三菩提。皆不可思議。

〔疏〕牒問中。脫於刹體。佛出現者。卽前威德也。阿云
無也。耨多羅上也。三者正也。藐者等也。又三徧也。
菩提覺也。謂道不可加。曰無上也。無邪委知。爲正。

徧也

○三徵歎總釋

何以故。諸佛子。十方世界一切諸佛。知諸眾生樂欲不同。隨其所應。說法調伏。如是乃至等法界。虛空界。

〔疏〕徵上難思言也。下釋云。能感之機。差別無邊。如

來。普應周于法界。廣難思也。下結文具顯。〔鈔〕結文具顯者。

即品末云。如世尊昔為菩薩時。以種種談論。種種語言。種種音聲。種種業。種種報。種種處。種種方便。

種種根。種種信。解。種種地位。而得成就。又隨宜說亦令眾。生如是知見。而為說法。即其文。

法。意趣難思。又等法界者。舉一說法。等餘多門。門

不可盡。量等法界。法門難思。又隨宜說法者。上指品末。廣故難思。今明

意趣深故難思。亦如法華方便品說。謂稱體大用。或隨自意。或隨他意故。又等法界下。多門難思。

○第四廣顯難思。文二。先總顯多端。二隨門別顯。

今初

諸佛子。如來於此娑婆世界諸四天下。種種身。種種名。種種色相。種種脩短。種種壽量。種種處所。種種諸根。種種生處。種種語業。種種觀察。令諸衆生各別知見。

〔疏〕舉娑婆爲首。畧顯十種。差別多端。準下結通實。通法界。十句不出三業。一身爲總相。現十法界不同。故云種種。一名以召實。次下廣辨。二金銀等色。

不同三十二相等異。鈔三金銀等色者。如觀佛三

佛為父王說觀諸相竟。佛白父王乃勅阿難。吾今

為汝悉現具足微妙身相。說是語已。佛從座起。令

眾俱起。令觀如來。從頂順觀。至足輪相。復從足相

逆觀。至頂。一身分。明了了。如人執鏡。自見面

像。若生垢惡。不善心者。若有曾毀佛。禁戒者。見像

純黑。猶如炭人。五百釋子。但見炭人。有千比丘。見

赤土色。優婆塞十六人。見黑象脚色。優婆夷二十

四人。見如聚墨。比丘尼。見如白銀。優婆塞。優婆夷

有見如藍染青色。四眾。悲淚。釋子拔髮碎身。自述

所見。父王安慰竟。釋子即起。白阿難言。我宿罪故。

不見佛身。佛為說。因過去毘婆尸佛時。有長者名

日月德。有五百子。聰慧無雙。不信父之正法。子臨

終時。父云。汝等邪見。不信正法。今無常刀。割汝身

心。為何所怙。令稱毘婆尸佛名。未及法。僧而終。生

四王天。後邪見。因故墮地獄。鐵叉刺眼。億父所教。

得生人中。六佛出現。聞名而不得見。以得聞六佛

名故。與我同生。如來令稱佛名。禮拜懺悔。還見相

好。即得初果。求佛出家。得阿羅漢。千比丘。見赤土

色者。過去然燈佛時。像法中。有千弟子。疑師。師見
 其臨終。令稱念然燈佛名。生初利天。以疑師罪。墮
 餓鬼中。洋銅灌咽。以稱佛名。今得值佛。佛示胸前
 卍字。令讀於此字中。說八萬四千功德。行即便懺
 悔。罪障消滅。得記作佛。比丘尼見白銀色者。過去
 釋迦佛時。五百童女。在山澤中。忽遇比丘。皆脫銀
 環。散上發願。願此比丘成佛時。願我見之。如所散
 諸佛。優婆塞見黑象脚者。此等昔時皆作國王。受
 邪沙門說。於邪法。其說法人。墮阿鼻獄。汝等隨惡
 友教。故墮黑暗獄。由前聞法善心力。故今得遇我。
 得受五戒。令其懺悔。佛放眉間白毫光。照便得初
 果。求佛出家。成阿羅漢。優婆夷見聚墨色者。佛說
 昔時寶蓋燈王佛。像法中。有一比丘。巡行乞食。至
 淫女家。其女見之。盛滿鉢飯。戲弄比丘。言汝顏色
 可惡。猶如聚墨。身所著衣。狀如乞人。比丘擲鉢。騰
 空飛去。諸女慚愧。懺悔。發願願此施食。所有功德。
 未來得如此。丘自在。以施食。故千二百劫。常不饑
 渴。惡罵。因故。六十小劫。墮黑暗獄。由發善心。今得
 值我。受其五戒。乃是供養阿羅漢。故見舍利弗。不

見我身佛為臍中出大蓮華化成光臺有百千聲
 聞身子目連作十八變諸女消二十億劫煩惱之
 結得須陀洹果後見佛身相好端嚴而猶不得見
 白毫相佛告大王戲弄惡口乃至得道見佛不明
 餘廣如經更不會說如藍之緣四形有長短三尺
 準例可知下十定品見色多種

丈六乃至無邊三尺等者三尺之身即瞿師羅長者所見丈六無邊即無邊身菩薩
 窮上界而有餘準十定品或見如來一由旬量百
 千由旬乃至不可說不可說佛刹微塵數世界量
 等畧去中間故

五壽命限量或無量劫或不滿百
 年下至朝現暮寂五壽命者或無量劫如阿彌陀或不滿百年如今世尊故涅槃
 云我聞諸天壽命極長云何如來是天中天壽命
 短促不滿百年下至朝見暮寂者如月面佛壽一
 日夜故佛名經第六云妙聲佛壽六十百千歲智
 自在佛壽十二千歲威德自在佛壽七十六千歲
 摩醯首羅佛壽一億歲梵聲佛壽十億歲大眾自
 在佛壽六十千歲勝聲佛壽百億歲月面佛壽一

日夜日面佛。壽一千八百歲。梵面佛。壽二十三
千歲。又第二云。諸佛壽命長短差別。有十阿僧祇百
千萬億毘盧遮那品云。一切功德須彌勝雲佛。六
壽五十億歲。下經之中。說諸佛壽長短多門。六
處。謂化處。染淨等殊。七根。謂眼等。隨感現異。八生
處。有利利等別。九依語之用。隨方言音。施設非一
故。十觀察者。周旋顧盼。以應羣機。又觀存亡。安危
可不。智照諸境。示有多端。下結意云。今諸衆生各
稱已分而自知見。得調伏耳。

○第二隨門別顯。文分爲三。初終此品。辨身名差
別者。上佛住之間。近廣種種身等入句。以色相
等皆屬身故。二四諦品。辨言教徧周。答佛所說

法問。近廣種種語業。三光明覺品。明光輪窮照。
 答上威德法性菩提三問。近廣種種觀察。其五
 句依報。但有現相答。廣在前會故。今初廣上名
 者。然聖人無名。為物立稱。若就德以立。德無邊
 涯。若隨機立名。等衆生界。雖復多種。皆為隨宜。
 生善滅惡見理而立。海印頓現。不應生著也。鈔
復多種下。以義統收。不出四悉檀義。一世界悉
 檀。但令歡喜。如來立名。少從於此。多約後三。今
 言隨宜。此為總句。四悉皆是隨物宜。故此句亦
 攝世界悉檀。二生善者。即是為人。三滅惡者。即
 是對治。四見理者。即第一義。四悉亦各四隨問
 明品中。更當廣說。海印頓現者。無盡之名。皆我
 本師海印頓見。即攝十方三世佛
 號。皆屬一佛隨宜之號。非約多佛。文中分四。一

娑婆之內自有百億。二娑婆隣近。卽百億之外。三類通一切。謂盡十方。四釋差別所由。由隨物故。初中分三。初此四洲。二四洲之隣十界。三總結娑婆。今初亦三。初標處。次列名。後結數。他皆倣此。

諸佛子。如來於此四天下中。或名一切義成。或名圓滿月。或名師子吼。或名釋迦牟尼。或名第七仙。或名毗盧遮那。或名瞿曇氏。或名大沙門。或名最勝。或名導師。如是等其數十千。今諸衆生。各別知見。

〔疏〕舉四洲者。昔云意取閻浮。言總意別。餘三天下。

佛不出故。然雖不出。除北俱盧。餘容有往。下並準之。一切義成。卽悉達也。無事不成就故。（鈔）一切義成者。梵名悉達多。太子時號。果收因名。恐人不知。故將梵言。以釋唐語。圓滿月者。惑斷智圓。恩蔭清涼故。師子吼者。名決定說。釋迦牟尼者。釋迦云能。能仁種故。牟尼云寂默。契寂理故。第七仙者。七佛之末故。若取賢劫當第四。仙卽喻也。無欲染故。毘盧遮那。廣如前釋。瞿曇氏者。唯約姓也。此云地主。以從劫初。代代相承。爲轉輪王故。然上云釋迦。乃是族望。此卽姓望。故智論第二云。釋迦牟尼。姓瞿曇。故佛名經亦然。沙門。此云息惡。無惡。

不息故。復稱大最勝者。聖中極故。德無加故。導師者。引導衆生離險難故。於生灰海示衆寶故。然名含多義。畧釋此十。恐文繁博。餘但隨難解之。

○二此洲之隣十界。卽爲十段。初善護

諸佛子。此四天下東。次有世界名爲善護。如來於彼。或名金剛。或名自在。或名有智慧。或名難勝。或名雲王。或名無諍。或名能爲王。或名心歡喜。或名無與等。或名斷言論。如是等。其數十千。令諸衆生各別知見。

〔疏〕其善護等。皆四洲之通稱也。今初東方。斷言論者。證離言故。無能說過故。〔鈔〕無能說過者卽大薩遮尼乾子所說經第四

卷有嚴熾王。請薩遮入宮供養。因問云。大師。頗有人於衆生界中。聰明大智。利根點慧。有罪過不。答言有。下有十重問答。大意皆同。一問是誰。一云。能兩婆羅門。聰明大智。常多淫慾。喜侵他妻。二頗羅墮。婆羅門。多睡。三黑王子。多嫉妬。四勝仙王子。多殺生。五無畏王子。慈心太過。六天力王子。飲酒太過。七婆藪天子。行事太過。八大仙王子。貪心太過。九大天子。輕躁戲笑放逸太過。十波斯匿王。噉食太過。第十一問。還更有不。答云。有。王亦有過。謂太暴惡。急卒。王聞大怒。令殺尼乾。尼乾驚怖。乞容一言。云。我亦有過。實語觀其可。不。我於暴卒人前。應於一切時。常行實語。觀其可。不。我於暴卒人前。出其實語。故爲太過。王悟悔過。更問。頗有聰明大智。利根。無有過不。答言。有。問。誰是。答云。沙門瞿曇。此一。無過。我四圍陀經中。說釋種種沙門。無有過失。所謂生在大。家。不可譏嫌。何以故。是轉輪王種故。種姓豪貴。不可譏嫌。以甘蔗種姓。家生故。福德莊嚴。不可譏嫌。三十二相。八十種好。十力。無畏。諸不其德。說如來具大慈悲。無礙辯才。一切功德。云。唯此一。人。廣說三十二相。八十種好。一切功德。云。唯此一。

無有過失。則顯餘皆不免。故
今疏云。無能說過。王聞發心。

○二難忍

諸佛子。此四天下南。次有世界。名爲難忍。如來於彼。
或名帝釋。或名寶稱。或名離垢。或名實語。或名能調
伏。或名具足喜。或名大名稱。或名能利益。或名無邊。
或名最勝。如是等。其數十千。令諸衆生。各別知見。

疏南云。帝釋者。爲天人主。能稱物心故。

○三親慧

諸佛子。此四天下西。次有世界。名爲親慧。如來於彼。
或名水天。或名喜見。或名最勝王。或名調伏天。或名

眞實慧。或名到究竟。或名歡喜。或名法慧。或名所作
已辦。或名善住。如是等。其數十千。令諸衆生各別知
見。

〔疏〕西云水天者。水善利萬物。天光淨故。

○四師子

諸佛子。此四天下北。次有世界。名有師子。如來於彼。
或名大牟尼。或名苦行。或名世所尊。或名最勝田。或
名一切智。或名善意。或名清淨。或名鑿羅跋那。或名
最上施。或名苦行。得如是等。其數十千。令諸衆生各
別知見。

〔疏〕北方瑩羅跋那者。具云。瑩溼弗羅跋那。瑩溼弗。自在也。羅跋那者。聲也。卽圓音自在耳。

○五妙觀察

諸佛子。此四天下。東北方。次有世界。名妙觀察。如來於彼。或名調伏魔。或名成就。或名息滅。或名賢天。或名離貪。或名勝慧。或名心平等。或名無能勝。或名智慧音。或名難出現。如是等。其數十千。令諸衆生。各別知見。

○六喜樂

諸佛子。此四天下。東南方。次有世界。名爲喜樂。如來

於彼。或名極威嚴。或名光焰聚。或名徧知。或名祕密。或名解脫。或名性安住。或名如法行。或名淨眼王。或名大勇健。或名精進力。如是等。其數十千。令諸衆生各別知見。

○七甚堅牢

諸佛子。此四天下西南方。次有世界。名甚堅牢。如來於彼。或名安住。或名智王。或名圓滿。或名不動。或名妙眼。或名頂王。或名自在音。或名一切施。或名持衆仙。或名勝須彌。如是等。其數十千。令諸衆生各別知見。

○八微妙地

諸佛子。此四天下西北方。次有世界。名爲妙地。如來於彼。或名普徧。或名光焰。或名摩尼髻。或名可憶念。或名無上義。或名常喜樂。或名性清淨。或名圓滿光。或名脩臂。或名住本。如是等。其數十千。令諸衆生各別知見。

○九燄慧

諸佛子。此四天下次下方。有世界。名爲焰慧。如來於彼。或名集善根。或名師子相。或名猛利慧。或名金色焰。或名一切知識。或名究竟音。或名作利益。或名到。

究竟。或名眞實天。或名普徧勝。如是等。其數十千。令諸衆生各別知見。

○十持地

諸佛子。此四天下次上方。有世界名曰持地。如來於彼。或名有智慧。或名清淨面。或名覺慧。或名上首。或名行莊嚴。或名發歡喜。或名意成滿。或名如盛火。或名持戒。或名一道。如是等。其數十千。令諸衆生各別知見。

〔疏〕上云盛火者。盛火焚薪。不擇材木。佛智利物。無揀賢愚。問餘聖教說。大輪圍內。平布百億。上卽諸

天下安地獄。如何此說。上下皆有四洲。答。此教所說。事隨理融。隨說法處。卽是當中。縱極上際。旁至大輪圍山。亦有十方。互爲主伴。以融爲眷屬。本數非多。十方界融。亦準於此。因此畧說娑婆融通。改非改相。畧有其五。一約事常定。如小乘說。二隨心見異。若身子梵王。三就佛而言。本非淨穢。四隨法廻轉。加上主伴互爲。五潛入微塵。如前會說。此以

下。二類顯義理。卽五教意。二通始終。二卽頓教四五皆圓。若通論餘淨土。更有

五義。謂諸刹相人義。相卽義。一具一切義。廣陞自在。義帝網重疊義。並如前後諸文所說。

○三總結娑婆

諸佛子。此娑婆世界。有百億四天下。如來於中有百億萬種種名號。令諸衆生各別知見。

○二彰娑婆隣近十方。亦爲十段。初密訓

諸佛子。此娑婆世界。次有世界。名爲密訓。如來於彼。或名平等。或名殊勝。或名安慰。或名開曉意。或名聞慧。或名真實語。或名得自在。或名最勝身。或名大勇猛。或名無等智。如是等百億萬種種名號。令諸衆生各別知見。

〔疏〕密訓唯九者。勘音經。開曉意下。闕一聞慧。

○二豐溢

諸佛子。此娑婆世界南。次有世界。名曰豐溢。如來於彼。或名本性。或名勤意。或名無上尊。或名大智炬。或名無所依。或名光明藏。或名智慧藏。或名福德藏。或名天中天。或名大自在。如是等百億萬種種名號。令諸衆生各別知見。

○三離垢

諸佛子。此娑婆世界西。次有世界。名爲離垢。如來於彼。或名意成。或名知道。或名安住本。或名能解縛。或名通達義。或名樂分別。或名最勝見。或名調伏行。或

名衆苦行。或名具足力。如是等百億萬種種名號。令諸衆生各別知見。

○四豐樂

諸佛子。此娑婆世界北。次有世界。名曰豐樂。如來於彼。或名蒼葡華色。或名日藏。或名善住。或名現神通。或名性超邁。或名慧日。或名無礙。或名如月現。或名迅疾風。或名清淨身。如是等百億萬種種名號。令諸衆生各別知見。

○五攝取

諸佛子。此娑婆世界東北方。次有世界。名爲攝取。如

來於彼。或名永離苦。或名普解脫。或名大伏藏。或名解脫智。或名過去藏。或名寶光明。或名離世間。或名無礙地。或名淨信藏。或名心不動。如是等百億萬種種名號。令諸衆生各別知見。

○六饒益

諸佛子。此娑婆世界東南方。次有世界。名爲饒益。如來於彼。或名現光明。或名盡智。或名美音。或名勝根。或名莊嚴蓋。或名精進根。或名到分別彼岸。或名勝定。或名簡言辭。或名智慧海。如是等百億萬種種名號。令諸衆生各別知見。

○七鮮少

諸佛子。此娑婆世界西南方。次有世界。名爲鮮少。如來於彼。或名牟尼王。或名具衆寶。或名世解脫。或名徧知根。或名勝言辭。或名明了見。或名根自在。或名大仙師。或名開導業。或名金剛師子。如是等百億萬種種名號。令諸衆生。各別知見。

○八歡喜

諸佛子。此娑婆世界西北方。次有世界。名爲歡喜。如來於彼。或名妙華聚。或名梅檀蓋。或名蓮華藏。或名超越諸法。或名法寶。或名復出生。或名淨妙蓋。或名

廣大眼。或名有善法。或名專念法。或名網藏。如是等百億萬種種名號。令諸衆生各別知見。

〔疏〕西北方名有十一者。獨此有餘。不成文體。此中專念法。應卽是前所脫聞慧。亦是梵本之漏注者。誤安貝葉耳。

○九關鑰

諸佛子。此娑婆世界次下方。有世界名爲關鑰。如來於彼。或名發起焰。或名調伏毒。或名帝釋弓。或名無常所。或名覺悟本。或名斷增長。或名大速疾。或名常樂施。或名分別道。或名摧伏幢。如是等百億萬種種。

名號。今諸衆生各別知見。

〔疏〕下方云帝釋弓者。如來念定之弓。以明利箭。能射業惑阿修羅故。然舊云法命主。意取帝釋以法。教命爲天主故。今云其弓。但一事耳。若作宮室字。以處取人大同。晉本。

○十振音

諸佛子。此娑婆世界。次上方。有世界。名曰振音。如來於彼。或名勇猛幢。或名無量寶。或名樂大施。或名天光。或名吉興。或名超境界。或名一切王。或名不退輪。或名離衆惡。或名一切智。如是等百億萬種種名號。

令諸衆生各別知見

○第三類通一切

諸佛子。如娑婆世界。如是東方百千億無數無量無邊無等不可數不可稱不可思不可量不可說盡法界虛空界。諸世界中。如來名號種種不同。南西北方四維上下亦復如是。

疏準四諦品更有舉此例餘十方亦如娑婆互爲主伴

○第四釋差別所由

如世尊昔爲菩薩時以種種談論種種語言種種音

聲。種種業。種種報。種種處。種種方便。種種根。種種信
解。種種地位。而得成熟。亦令衆生。如是知見。而爲說
法。

〔疏〕此有二意。一自既由於差別名言等而得成就。
今還倣古。以差別熟他。二昔菩薩時。隨機調物。今
時出世。稱本立名。如昔教衆生。令空妄境。今成正
覺。爲立超境界名。他皆倣此。故而得成熟之言。通
自他也。

〔論〕此如來名號品。非但論名號徧周。但是如來身
口意業。總皆徧周。文殊師利菩薩畧而都舉。如前

文中云。諸佛子。如來於娑婆世界諸四天下。種種身。種種名。種種色。相等。如經廣明。卽明此品總答。如來身語意業。一切徧周。從此品文殊師利舉佛果海身語等。一切徧周。令大衆自信己身。同佛三業。入如來性海。等如來智。發跡進修。經過十住。十行。十迴向。十地。十一地。直至如來出現品。是其一終因果。此名號品。是始初入信。名號徧周。卽一切名。總是自佛之果。出現品。是己身自修行。行滿之果。是故如來放眉間光。灌文殊頂。使令問佛出現果法。放口中光。灌普賢口。使令說佛果德。始明自

行因果徹故。明文殊普賢理智妙行。此齊體也。離世間品。法界品。雖在其後。爲文字相排。似有前後。總是前後相通徹法故。總是一圓滿法故。如法界品。是此一部經之大體。爲一切凡聖之本源也。前初會信佛果。卽以如來並普賢爲首。卽明已成佛果。及已行之果生信。今以自己入信修行門。卽以文殊師利。及如來名號并四諦法門。爲所信之因果。卽明以妙慧法門。及名言而修學故。問曰。何故如來不自說其教。何用放光。令菩薩說。答曰。如來意。令當位菩薩。說當位法門。令修學者。知分劑易。

解故。文殊常與一切諸佛及一切衆生作信心之
因。成妙慧之本母。普賢菩薩常與一切諸佛衆生
作修行之因。以此二人成就菩提無作智果大悲
之海。令二人自相對問。如來出現品。明是修行者
因果。始終圓滿前後因果。性果。智果。行果。相徹一
體。故明從此品至出現品。文殊普賢二行因果。信
心者。修行位滿。體用徹故。今後學者易解故。如有
兩品經。如來自說。前已述訖。明是佛果。二愚。至佛
方明。如來名號。品竟。

泉州開元寺比丘太彬刊刻
華嚴經如來名號品疏論纂要第二十
卷流通伏願具文殊之大智興普賢之
妙行圓毘盧之果海者
康熙二十二年九月 日華藏室謹題

大方廣佛華嚴經疏論纂要卷第二十